

## **Inuussutissarsiornermut Aatsitassanullu Naalakkersuisoq Oktober 2012**

London Mining-ip Isukasiani saviminissarsiorfissa pillugu den ulloq 8. oktober 2012  
Katuami innuttaasunik ataatsimiititsinermi oqalugiaat.

London Mining-ip Isukasiani saviminissarsiorfissami piaanissamut akuersissummik qinnuteqaataanut tunngatillugu tusarniaanerup ingerlaneranut atatillugu innuttaasunik ataatsimiititsinerit sisamat ingerlanneqareerput. Maannakkullu ataatsimiititsineq kingulleq naammassivarput. Kisianni innuttaasunik ataatsimiititsinerit matumuunakkut naammassigaluartut oqallinneq unissanngilaq. Suli [www.nanoq.gl](http://www.nanoq.gl) –imi tusarniaanermut, ulloq 19.oktober killeqassasoq aalajangiunneqartumut akissuteqaateqarnissamut piffissaqarpoq.

Innuttaasunik ataatsimiititsinerit uumaarissumik ingerlanneqarput – aammalu takkuttorpasuit apeqqarissaarluarsimapput. Tamanna innuttaasunik ataatsimiititsinerup anersaarilluinnarpaa. Aammalu uanga nammineerlunga soqutiginninnerujussuaq ilissi – innuttaasut – oqallinnermi peqataanissinni takutitarsi nuannaarutigisorujussuuara.

Innuttaasunik ataatsimiititsinerit taakkua kateriffiusimapput, tassani akuutinneqartut innuttaasullu naapissinnaasimallutik, aammalu aatsitassarsiornermi suliassaq inuiaqatigiinni atituumik isigalugu qanoq sunniuteqarsinnaanersoq pillugu apeqquterpassuit imaluunniit aarlerissutigineqartut naatsorsuutigineqartullu mumittaarneqarsinnaasimallutik.

Maannakkorpiaq London Mining – oqareernittut – piaanissamut akuersissummik pissarsinissamik qinnuteqarnini ingerlappaa. London Mining qinnuteqaatiminik akuerineqassaguni – suliassaminillu aallartitsissaguni, aappi, taava London Mining suliassamik ingerlanneqarnerani piffissaq tamaat innuttaasunik suli oqaloqateqartussaassaaq. IBA-mut isumaqatigiissummi London Mining-ip, Kommuneqarfik Sermersuup aamma Naalakkersuisut akornanni atsioqatigiisutigineqartussami ilaatigut oqaloqatigiinnermut tassunga killissaliussassat aamma aalajangersarneqartussaapput.

London Mining-ip saviminissarsiorfissaa pillugu matuma siuliani innuttaasunik ataatsimiititsinermut atatillugu pissusiviusut arlalippassuiat aammalu oqaatigineqartut arlallit saqqummerput. assersuutigalugu London Mining suliassaminnik ingerlatsinissartik qanoq eqqarsaatiginerlugu arlalinnik kissaatigisaminnik saqqummiipput, taamatullu ingerlatseqatigiiffik iliornissaminik aamma pisinnaatitaaffeqarpoq.

KISIANNI – aammalu erseqqissassallugu pingaaruteqarpoq, qinnuteqaat inaarutaasoq aatsaat inatsimmi piumasaqaataasunik naammassinnissimappat akuersissuteqarfigineqarsinnaavoq. Qinnuteqaat pillugu Naalakkersuisut aalajangiippata, tamanna malittarisassat inatsimmi nassuiarneqarsimasut ersarilluinnartut malillugit pisussaavoq.

Allatut oqaatigalugu: Aatsitassarsiorluni suliassaq qanoq ingerlanneqassanersoq inatsisit atuuttut malillugit sukkulluunniit piumasaqaateqartartussaavugut aammalu pisariaqartitsisoqartillugu suli annertunerusunik piumasaqaateqarsinnaalluta.

Erseqqissassallugu pingaaruteqarpoq ingerlatseqatigiiffik qinnuteqaamminik suli akuersissuteqarfigineqanngimmat, taamaattumillu oqartussaasut akuersissutini inaarutaasuni akuersissuteqarnernilu sukannernerusunik immikkut piumasaqaateqarsinnaapput TAAMAALIORNIARLUTILLU.

Innuttaasunik ataatsimiititsinerni arlaannaannulluunniit attuumassuteqanngitsumik aqutsisuliisoqassasoq upernaag manna annertuumik kissaateqartoqarpoq. Taamatut kissaateqarneq isumaqatigisimavarput taamaattumillu tamanna naammassisimallutigu. Aammalu tamatuma saniatigut innuttaasunik ataatsimiititsinerit sammisanut assigiinngitsunut aggulunneqarput, taamaalilluni avatangiisinut aammalu inuiaqatigiinni pissutsinut tunngatillugu itisiliisoqarsinnaassamat apeqquteqartoqarsinnaassalluni aammalu aarlerissutaasunik saqqummiisoqarsinnaassalluni.

Innuttaasut tusarneqarnissamik periarfissinneqarnissaat kissaatigisimavarput. Ataatsimiititsinerni matumatut ittuni ilissi innuttaasut inuiaqatigiinni unammilligassavut pillugit taakkunungalugu qanoq aqqiissuteqassanersugut oqallinnermut peqataanissamut soqutiginnilersissinnaassallusi neriuutigaarput.